

La grafica mossa l'istorgia differenta da las duas partidas PBD e PCD che han midà gia pliras giadas lur num.

GRAFICA RTR

# La maridaglia è reussida


PBD e PCD maridan er en il Grischun e prendan il num Allianza dal Center

MARTIN CABALZAR/FMR

■ **La PCD e la PBD dal Grischun s'uneschjan en l'Allianza dal Center (ADC). Quai han delegadas e delegads da tuttas duas partidas decidì a lur radunanzas parallelas a Landquart.** Duas partidas da gronda tradiziun che han midà pliras giadas lur num èn s'unidas per far frunt a la digren da lur electoral e mantegnair lur relevanza sin plaun naziunal. Las decisiuns èn crudadas cun maioritads sorprendentas: la PBD ha approvà unanimamain il contract da fusiun, tar la PCD hai dà sulet ina cuntravusch. La fusiun va en vigor immediat.

L'Allianza dal Center dal Grischun vegn presidiada cuminaivlamain da dus Rumantschs, dal deputà ed anteriur president da la PCD *Kevin Brunold* (Surcuolm) e da l'actuala vicepresidente da la PBD e dal Cussegl grond *Aita Zanetti* (Sent). Sco viceparsuras vegnan tschernids *Yvonne Brigger-Vogel*, *Alexandro Della Vedova*, *Gian Michael* e *Martina Widmer*, dal directori fan er *Nicolina Laim* e *Fabio Maurizio* part.

Gia a la proxima sessiun dal Cussegl grond a Tavau vegn la ADC a furmar ina nova fracziun communabla. A disposiziun per il co-presidi stattan *Martin Bettinaglio* (Claustra) e *Reto Cramer* (Surava). La fracziun vegn a dumbrar – suenter trais exodus – 50 commembras e commembers. En la



Il territori da la nova Allianza dal Center (ADC).

GRAFICA RTR

regenza è la ADC represchentada cun *Marcus Caduff*, *Mario Cavigelli* e *Jon Domenic Parolini*, en il Parlament federal cun *Stefan Engler* (cussegl dals chantuns) e *Martin Candinas* (Cussegl naziunal).

## Libertad – solidaritad – responsabladad

Il fundament da la ADC furman las valurs libertad, solidaritad e responsabladad. «Quellas valur mainan vinavant l'ierta politica da la PCD e da la PBD e vegnan interpretadas da nov en in mund che sa sviluppescha adina vinavant» accentuescha Kevin Brunold. La pli gronda finamira da la nova partida saja da

rinforzar la politica dal center, tschertgar soluziuns da cumpromiss raschunavlas ed evitar la polarisaziun. «L'Allianza dal Center duai porscher in dachasa politic a tut quellas e quels che mettan paisa sin ina politica che promova la convivenza cun respect e responsabladad e che resguarda er la dignitad umana» punctuescha Aita Zanetti. In accent vul la ADC dar a la promoziun da las dunnas e dals giuvenils. La ADC vul plinavant s'engaschar per levgiar e promover las famiglias, per sustegnair interpresas pitschnas e mesaunas, per mantegnair plazs da lavur, per in'agricultura ferma, per in servetsch public at-

tractiv e per rinforzar las regiuns muntagnardas e periferas.

## Preschientscha èn l'entir chantun

Era la PCD fin qua cunzunt preschenta en Surselva, Surmeir ed en las Valli, la PBD en Engiadina, Partenza e Viamala, cuvra la ADC uss l'intschess da prest l'entir chantun. Ella dumbra passa 2400 commembers, repartids sin 44 partidas regionalas, cirquitalas e localas.

Actualmain dispona la ADC da 50 dals 120 sezs en il Cussegl grond, da 3 cusseglers guvernativs e da 2 parlamentaris federalis. Quai dastgass dentant sa midar primavaira proxima tar las eleziuns dal Cussegl grond e da la regenza. Tant pli ch'è il parlament vegn probabel elegi tenor il sistem dal proporz dubel che vegn en votaziun ils 13 da zercladur. Tendenzialmain dastgassan ils pols da dretg e sanester gudagnar, il center sperder. Anc avant la fusiun han dus deputads da la PBD ed in deputà da la PCD midà fracziun. Actualmain sa cumpona il Cussegl grond da 50 deputadas da la ADC, 37 da la PLD, 20 da la PS, 10 da la PPS e da 3 senza fracziun. Resguardond la midada dal sistem electoral ha il politolog *Clau Dermont* gi fatg la suandanta prognosa per las eleziuns da primavaira proxima: ADC 45 (-8), PS 33 (+14), PPS 22 (+13), PLD 20 (-16). Lain mirar!

## COMMENTARI

# La fusiun sto pir anc sa cumprovar

MARTIN CABALZAR/FMR

Cun in tempo rasant e cun maioritads sorprendentas han PBD e PCD decidì da far nozzas, l'emprim en Svizra e lura en il Grischun. La finamira cuminaivla dals dus conjugals è da rinforzar il center politic vers la polarisaziun creschenta da dretg e sanester. E qua en tant la PCD sco la PBD sa cumprovadas sco promoturas dal consens politic a favur d'in cumpromiss raschunavel che procura per l'equiliber e tegn la finala ensemen la Svizra.

Quai che fiss stà nunimaginabel anc avant paucs onns è la finala tuttenina daventà realitad. Duas partidas oriundamain concurrentas, differentas da svilup e mentalitad, porschan uss maun per ina lia cuminaivla. Quai na capita probabel betg mo or da spira charezza, anzi er ord opportunitad e sut in tschert squitsch. Sin palancau svizzer è la digren da tuttas duas partidas manifesta. La PCD

ha pers sia segunda sutga en il Cussegl federal, numerus mandats en il Parlament federal ed en blers chantuns. La PBD ha pers suenter la retratga da sia cussegliera federala *Eveline Widmer-Schlumpf* e ses sulet mandat en il Cussegl naziunal prest tut sia relevanza politica sin palancau naziunal. E questas tendenzas paran da cuntinuar, la polarisaziun e profilaziun da dretg e sanester anc a crescer.

Tut auter sa preschenta la situaziun en il Grischun. La PCD è actualmain en excellenta furma, dispona puspè da dus mandats en la regenza e cun 30 mandats ina terza dals sezs en il Cussegl grond. La PBD ha bain pers in mandat en la regenza, resta dentant cun 20 mandats ina forza relevanta en il parlament. Quai malgrà la separaziun da la PPS. Quella para dentant da sa restabilir puspè pass per pass, cunzunt er en vista a la midada dal sistem electoral. A profitar da quel vegnan dentant er ils socialdemo-



«Ina maridaglia da sauna raschun e betg mo da spira charezza»

Martin Cabalzar

crats, ils verd-liberals ed ils verds. L'aria en il center politic dal Grischun daventa uschia adina pli sagittia. Pia nairas uras d'agir.

La politica na viva betg mo da l'aritmetica e da maioritads numericas. Blerun pli impurtanta è relevanza ed effizienz dals programs per dar dumogn a las sfidas actualas e futuras. Bler dependa er da la perseveranza e consequenza enten realisar els, da l'engaschament e da la credibilitad dals exponents e da la forza da persvader e mobilisar il suveran. Cunzunt er las dunnas e la giuventetgna.

En quest senn stat l'Allianza dal Center avant grondas sfidas en vista a las eleziuns chantunales da l'onn proxim ed a las eleziuns naziunalas da l'onn 2023. Ella sto chattar svel in consens intern tranter las differentas alas, definir pli cleramain ses profil e far blera lavur da persvasiun. L'ura da la cumprova arriva pia pir anc?